

1TH -

1 Tesalonikə tián

Təntən sagı tə, Polə nə púpúní v pa

Tesalonikə tián

Kərisə lià tə nə

Tesalonikə tián təntən sagı tə yuu wa sugu

Lìù tə, v nə púpúní sagı ku tə

Ku yi *tuntunu Polə nə púpúní ku.

Lìà tə nə, Polə nə púpúní

Sagı ku yi təntən sagı tə, Polə nə púpúní v pa *Kərisə lià tə nə, ba nə wulə Tesalonikə nə. Tesalonikə yi ku wulə Masedwanə nagwanaa tə wa.

Sagı tə wa sugu

Nəŋə ku tə yırı, Polə nə púpúní ba nə: Polə nə dıga *Kərisə lià púlí təntə dèń Tesalonikə nə. Yá v dāń yà mɛ, sə v dəri v jén *Zwifə-ba duən yáá nə, ba nə wà v kàrà tə sè, ba ga zıga v nə. Polə dāń púpúní sagı ku tə, v pa Kərisə lià púlí tə nə, sə ku pa v tutuŋı tə kwen ku tun ku va yáá wuuu.

Polə pìà v bırı də, v pùé poli, yoo mama nə vəli zəni, Kərisə lià púlí nədun təntə wa yırı. Polə bwi ba nə, ba nə vəli yáá tə yırı, v dāń ga daŋa ba jìàn, sə ba tə kwen ba tun ku ba doni nətu. Ba cígá yà dānì *Yuu-Tiu Zwezi-Kərisə túrí tə. Yá twara yà jə Kərisə lià tə duən, ba duən yà nə tı də Yuu-Tiu tə wà twi tə yırı. Polə pìà, sə v bırı ba tıga təntə yoo nə wá ya nətə.

Polə jònì Kərisə lià tə Tesalonikə nə

¹ À mù Polə də Siləven də Timote nə púpóní nə pɪn *Kərisə lià púlí tə nə, ku nə wulə Tesalonikə nə. Ku púlí təntə də nyɪna Yu də *Yuu-Tiu Zwezi-Kərisə nə vwə duən nə. Yu nə wá fwa pubwanv á yɪra, v ga pa aba bɪcan sió.

Nətv tə Tesalonikə lià nə ken ba waa Zwezi nə

(Filipə tián 1.3-6, Kolosə tián 1.3-8, 1 Tesalonikə tián 2.13-14)

² Nə yɪjɪnɪ mama wa, nə yàá lòrì Yu nə pɪn aba, na ga kəni Yu lèè mánjá mama, á mama yɪrɪ. ³ Nə yàá líí á yoo mánjá mama, nə nyɪna Yu yáá con. Nə líí nə tián tutuɲi tə, á nə keni á waa Zwezi nə, wuuu á ma tun. Nə líí nə tián də ku tə á sonu, tə nə tuɲa də, á nə zɪga dián yala tə wa, á nə jə nə *Yuu-Tiu Zwezi-Kərisə con. ⁴ Nə nubɪa-ba, nə yèé də, Yu sóní aba. U kúrí aba, sə á ya v mù lià. ⁵ Nə swìn suywánjú tə nə burɪ aba. Ku tà də nii sùràn cɪcɪ, ku yɪn də Yu dián tə də Yu-*Siɲu tə tutuɲi tə. Yá nə yà ba bèé də, suywánjú tə yɪ cígá. Á yèé nə nə jɪn nə tián nətv, nə ja yà á tətəɲi wa, sə nə ma san aba. ⁶ Ku mù nə pɪn, á yɪ ndə nə mù də Yuu-Tiu nə yɪ nətv. Á dí càn zənzən, á ma jon Yu sugv tə. Yu-Siɲu tə nə pɪn aba pupwən. ⁷⁻⁸ Yuu-Tiu sugv tə zɪgɪ á con, ku ma yí Masedwanə nagwanaa də Akayi nagwanaa. Ku nətv dān pɪn á jì lià tə, Masedwanə də Akayi Kərisə lià tə mama nə mɛ, sə ba jì ndə á nə. Ku tə nə sùrí lá, ba swìn nətv tə, á nə kəni á waa Yu nə, bwálí mama nə. Ku mù nə pɪn, nə mù con, ku ba dèñ jə, sə nə kùù swìn ka yoo. ⁹ Lià tə mama yàá swìn nə yoo. Ba maɲa nətv tə, á nə sè á ja nəba, mánjá tə wa, nə nə twi á con. Ba maɲa nətv tə, á nə lwàn pubuɲi á bà Yu con, ku pa á sè á dugv woɲwanan, sə á ga tun á pa Yu nə. Yu təntə nə wulə mu wa, v ga yɪ cígá. ¹⁰ Yá á dān dānì də, v biú Zwezi tə, v píí v bwin

u zìn tian wa, pìí u naŋa yu u biàn. U mù Zwezi tē nē jon nēba Yu bura tē wa, ku nē biàn.

2

Tutuŋi tē, Polē nē tun, Tesalonikē nē yoo

(Tutvnan 20.18-21, 31-35, 2 Korēntē tiān 4.1-2, 5, 6.3-10, 12.12-15)

¹ Nē nubia-ba, á tētē yēé ku zēni dē, nē nē twi á con tē, ku wà tutu yin.
² Á yēni dē, nē dí cān dē ba fūfūn nēba Filipē nē, ku tē wà dān. Ku kwa nē, nē nyina Yu pūn fēn kùbē ba nēba jē, sē nē swīn suywángú tē, nē buri aba dē, yìèn nē swē tē zīgā, sē tē cì ku yáá nē dē. ³ Nē kwìè tē, nē nē kwè lià tē nē wà kunkun, nē à yēé pubunkukwūn sūrān, nē twá nē ma kwè ba. Yá nē wà sírí ken, sē nē pa ba jén. ⁴ Yu dān nē nī dē, nē mē, sē u pa nēba suywángú tē, u ma pa ku nēba. Ku mù nē pūn, nē dān nē swīn ku tà, sē nē ma poli lēzoni pwíí, ku ya, sē nē ma poli Yu pùé. U mù nē yēé nē pubuŋi tē dēn, nē lù nētu. ⁵ Ndē á nē yēé ku nētu, nē tē wà gīgāra sūrān swīn á con mama, nē ga tē wà sūrān swīn, sē nē ma pià sēbia. Yu yēé yoo tēntē zēni. ⁶ Nē wà pià, sē nē na dūn lēzoni yáá con, ku nē yī á mù yáá con, nē à yēé ba duēn yáá con. Yá nē yà ga nē ya Zwezi-*Kērisē *tūntūna tē, nē yà wàá diān nē dé á yuu wa. ⁷ Ku ga wà nētu yin. Nē waa yin bwānì á yuu wa mánjá tē wa, nē nē yin á con, ndē nuu nē ywānjá u bia yuu nētu. ⁸ Nē wubwanu tēntē nē pūn nē wà sōnì, sē nē swīn Yu suywángú tē cici nē buri aba. Nē sōnì dē, ku nē yī tian dē, sē nē sē nē ti á yiri. Ku nētu tē buri dē, á yoo cà ku pa nēba. ⁹ Nē nubia-ba, á dān wàá á tiān á líí tutūncaran tē, nē nē yáá tūn, dē gwaru tē ku nē yáá yī nēba yoo. Nē yáá tūn titūn dē yīcāu, sē ku pa nē dān ká ya á liù mama yuu zili. Yá nē swīn Yu suywángú tē nē buri aba.
¹⁰ Nē yin dē á mù lià tē, á nē kēni á waa Zwezi nē wuuu, nē buri aba dē, nē yī lià tē, ba nē yī Yu nē ti, nē yī cīgá tiān Yu yáá con. Yoo mama yà

tèlè nè yuu wa, liù nè wàá nè nii nè v caga ku yiri. Á mù ní ku tẹ, nè nè yin, Yu dẹ ga na ku. ¹¹ Á yèé dẹ, ku tẹ, nè nè tun dẹ á liù mama, ku ya ndẹ nyina dẹ v bia nè. ¹² Nẹ kwè aba, nè pa á bicanì zùrì. Nẹ zigi diàn nè lòrì aba, sẹ á yà lià tẹ, á nè mẹ, dẹ Yu kùrí aba, sẹ á twá á ya v pàrì tẹ wa, dẹ v dun tẹ wa.

(1 Tesalonikẹ tián 1.6-10, 2 Tesalonikẹ tián 1.4-5)

¹³ Nẹ nè swìn Yu sugu tẹ á con, á ken á waa ku nè ndẹ Yu sugu nè. Á wà ku cígá pín ndẹ lẹzoni sugu nè. Ku cígá ga ya Yu sugu tẹ, ku nè tuja á mù lià tẹ, á nè ken á waa Zwezi nè bicanì wa. Ku mù nè pín, nè kẹni Yu lèè wuuu. ¹⁴ Nẹ nubia-ba, á dẹ yi ndẹ Kẹrisẹ lià púlá tẹ nè yi nẹtu, tẹ nè wulẹ *Zwide nagwanaa wa, tẹ dẹ Zwezi-Kẹrisẹ nè vwẹ duẹn yira. Ku mù nè pín, á tẹtẹ dwíí tián tẹ ma kẹ càn á nè, ndẹ *Zwifẹ-ba dẹ nè ken càn ba nè nẹtu. ¹⁵ Mẹ ba mù nè gua *Yuu-Tiu Zwezi dẹ Yu nii *sùsùnà tẹ, ba ga fifin nẹba. Ba mù ba Yu pùé poli, ba ga ya liù mama duju. ¹⁶ Ba mù nè kẹni diàn ba cì nè nè, sẹ nè dàn ká swìn Yu sugu tẹ nè bírì lià tẹ, ba nè tà Zwifẹ-ba, sẹ ku jon ba ba cuna tẹ wa. Ba fwa nẹtu, ba ma sùrí ba cuna tẹ wuuu. Yu bura tẹ dàń twi ku ja ba, dẹ mánjá don wa.

Polẹ swẹ, sẹ v pìí v va Tesalonikẹ

(Romẹ tián 1.9-13, Tùtùnnán 17.14-16, 14.22)

¹⁷ Nẹ nubia-ba, nè mù dẹ á mù pwè nè yá duẹn, mánjá mancín wa. Nẹ kùbè tèlè duẹn nè, yá nè bicanì ga tẹ buja á yoo wuuu. Á fira jin nẹba zẹnzẹn! Yá nè yà sóní, sẹ nè pìí nè na aba nè yíá wa. Ku mù nè pín, nè dàn ma bíbarì, sẹ ku yoo tẹntẹ wàní ku tun. ¹⁸ Nẹ yà pìà, sẹ nè pìí nè bà á con. À mù Polẹ dédén, sẹ à bà á con, ku nẹẹ cé duẹn, yá *Sitana cì nè yáá nè, ku wà wàní. ¹⁹ Nẹ jẹ yala nè wulẹ pupwẹn wa á yiri. Mánjá tẹ wa, nè *Yuu-Tiu nè wá pìí v bà, á wá ya ndẹ dun yupuu nè, v nè wá pa nẹba. ²⁰ Á mù cígá nè ya nè dun dẹ nè pupwẹn.

3

¹ Nə dân wuuu nə ga, nə kùb wàrì nə dânì. Nə nì də nə mɛ, sə nə ya Atenə wa yəbə, nə cici. ² Ku mù nə pɪn, nə ma tun Timote á con. U yɪ nə nubiu Kərisə yɪrɪ, v nə tɔŋa v pɪn Yu nə. U də swìn Zwezi-Kərisə sɔyɰwánǵ tə v bɪrɪ. Nə tun wá á con, sə v bà v kwè aba v pa á zɪɣɪ diàn, sə á kə á waa Zwezi nə wuuu. ³ Nə pìà, sə á liù mama dân ká dɔɣu Yu cwəŋə tə, càn zənzən tə yɪrɪ, nə nə wulə tə wa. Á tətə yèé də, ku yoo təntə mɛ, sə ku tun nə mù lià tə yɪra, Yu nə kúrí. ⁴ Mánǵa tə wa, nə nə yɪn á con, nə yà dí yáá nə swìn á con də, ba wá kə càn zənzən nə nə. Á də yèé də, ku mù mánǵa təntə dân nə yí. ⁵ Á dân nə kùb wàrì à píní, à dânì á yoo wa. Ku mù nə pɪn, à ma tun Timote á con. Á tun wá, sə v bà, v na nətɔ tə, á tə nə kəni á waa Zwezi nə wuuu. Fən yà jə nə də, *Sítana nə wá bà v dádón aba, sə v yigu aba v pa á tun yokukwɪɔn. Də ku nə jigə nətɔ, v wá pa nə tutuŋɪ tə mama jì tutɔ.

⁶ Sín nə, Timote pìí v nan á con, v bà nə con. U swìn v bɪrɪ nəba də, yìèn tə mama zìèn á con. U swìn də, á kəni á waa Zwezi nə wuuu. U bɪrɪ nəba, nətɔ á nə sonu də, nətɔ tə á nə tə líí nə yoo zəni zəni mánǵa mama. U bɪrɪ nəba, nətɔ tə, á nə pìà, sə á pìí á na nəba, ndə nə də nə pìà, sə nə na aba nətɔ. ⁷ Nə nubia-ba, ku mù dân nə pɪn, nə wɔwɔlɔ tə mama wa, də nə càn zənzən tə mama wa, nə bɪcɪnɪ zùrì, də á nə ken á waa Zwezi nə. ⁸ Á zɪɣa diàn *Yuu-Tiu nyièn tə wa. Ku mù nə pɪn sín nə, nə mu kùb pìí ku siŋə cíǵá cíǵá. ⁹ Bèè won nə, nə wá tun, nə ma kə Yu lèè á yɪrɪ? Nə wàrì nə nyina Yu lèè nə kəni nə zwè, pupwən tə yɪrɪ, nə nə jə á yuu wa Yu yáá con. ¹⁰ Titun də yɪcɔv mama, nə yáá lòrì Yu cíǵá cíǵá, sə v pa nəba cwəŋə, sə nə pìí nə na aba nə yíá wa. Nə pìà nə sùrí won tə, ku tə nə mùrì aba, á nə kəni á waa Zwezi nə, yoo wa.

¹¹ Nə nyina Yu tətə, də nə Yuu-Tiu nə wá sùrí cwəŋə v pa nəba, sə nə

wàní nè bà nè na aba. ¹²Yuu-Tiu wá pa á sonu tẹ, á nè swẹ duẹn tẹ súrí wuuu. Yá, sẹ kú sonu tẹ wàní kú yí lià tẹ duẹn tẹ mama, ndẹ nè sonu tẹ yiri tẹ nè, nè nè swẹ aba. ¹³Yuu-Tiu nè wá pa á zigi diàn. U wá pa, á ya v lià tẹ v nè ti, cuna dàn ká ya á yuu wa, liù nè wá cẹgẹ aba kú yiri, ba nè wá caga á nii nè tẹ yiri, nè nyina Yu yáá con kú máńá tẹ wa, nè Yuu-Tiu Zwezi nè wá pìi v bà dẹ lià tẹ mama, ba nè yi Kẹrisẹ nè ti.

4

Nẹtv tẹ Yu nè swẹ, sẹ v lià ya yoo

(1 Piyerẹ 1.14-16, 22, 4.1-5, 1 Korẹntẹ tiàn 6.13-20)

¹Nẹ nubia-ba, kú tẹ nè nè kùù wá swìn, nè súrí lá, nè biri aba nẹtv tẹ, á nè mẹ, sẹ á ya, sẹ kú poli Yu pùú. Á cígá twá kú nii nè. Nẹ dàn tẹ lòrì aba pwẹpwẹ, nè ga kwẹ aba dẹ *Yuu-Tiu Zwezi yiri tẹ, sẹ á tẹ tun kú, á doni nẹtẹn. ²Á yẹú kwìdẹ tẹ, Yuu-Tiu Zwezi nè pin, nè ma kwẹ aba. ³Kú tẹ Yu nè pìà, kú mù nè yi, sẹ á yà lià tẹ, v nè yá á tiàn míámíán Yu jiàn wa. U pìà, sẹ á cì á tiàn nè, á dànà ká pẹnì duẹn nè vẹẹ vẹẹ. ⁴U pìà, sẹ á liù mama lwarì, v nè mẹ, sẹ v ja v tiàn nẹtv, v ma swe v kan, sẹ kú biri dẹ v yi Yu nè ti, sẹ zìlẹ ga ya kú wa. ⁵Á dànà ká twá á pùú yokukwìnan fira tẹ nè, ndẹ liù tẹ nè, v nè yẹri Yu, nè yáá fwa nẹtv. ⁶Kú mù yoo tẹntẹ wa, sẹ liù mama dàn ká fwa yoo tẹ, kú nè wà mẹ v don yira v nè yi v nubiu *Kẹrisẹ yiri. U wà mẹ, sẹ v cùgù v yìèn. Nẹ dí yáá nè swìn kú yoo tẹ á con cígá cígá, nè tún lá. Yuu-Tiu wá kẹ càn lià tẹ nè, ba nè tẹja tẹ yolwana tẹntẹ. ⁷Á yẹú dẹ, Yu wà nẹba kúrí, sẹ nè tún durẹn yìèn. U kúrí nẹba, sẹ nè yà lià tẹ, nè nè yá nè tiàn míámíán. ⁸Kú mù nè pin, liù tẹ, v nè viga kàrà kú tẹ, kú ya Yu nè v viga. Kú tà lẹzwẹnẹ nè v viga. Yá Yu nè pin aba v *Sinju tẹ.

⁹Kú nè yi nẹtv tẹ, á nè mẹ, sẹ á sònì duẹn yoo wa, kú kùù ba dẹń jẹ, sẹ nè púpúnì kú nè biri aba. Yu tẹtẹ nè dí yáá v biri aba nẹtv, á nè mẹ, sẹ á sònì

duən. ¹⁰ Mə ku mù sonu təntə nə, á swə lià tə mama, ba nə yɪ à nubia Kərisə yurɪ, ba nə wulə Masedwanə nagwanaa tə mama wa. Nə nubia-ba, nə tə lɔ̀rì aba, sə á tun ku, á doni nətən. ¹¹ Á kəni diàn, sə á ya duən nə də sìé, sə á liù mama ywàń v tətə tùtùnán yuu, sə á tətə nə tun də á tətə jìàn, á ma pià á nii wodiu, ndə nə nə buri ku aba nətɔ. ¹² Ku nətɔ tə nə wá pa lià tə, ba nə tà Kərisə lià zìlì aba. Yá á kùb ba ya liù mama yuu zulu.

Ka pìí ka bwin ka nan tian wa yoo

(1 Korentə tìán 15.19-58)

¹³ Nə nubia-ba, nə pià, sə á lwarɪ cígá tə, ka nə wulə lià tə, ba nə tɪga tə yoo wa. Ku nətɔ wá pa, á dǎn ká ya pucɔnɪ wa, ndə lià duən nə, ba nə ba yala jə, də ba wá ya də Yu. ¹⁴ Nə pɪn cígá də, Zwezi tɪga, v pìí v bwin v nan tian wa. Yá mə nətɔ tətə nə, Yu wá bwin tɪga tə, ba nə kəni ba waa Zwezi nə, v sùrí Zwezi nə.

¹⁵ Á nəŋə ku tə, *Yuu-Tiu nə kàrì nəba, nə nə pià, nə swìn nə buri aba. Ku mù nə yɪ, mǎŋá tə wa, Yuu-Tiu nə wá pìí v bà, nə mù lià tə, nə nə tə wà tɪ tə, nə bá dó tɪga tə yáá. ¹⁶ Yu wá pa nii. *Malike pìú tə wá swìn də kori nəfarɔ. Ba wá wúrí Yu nabwana. Ku mǎŋá tə wa, Yuu-Tiu tətə wá nan Yu nə v cú. Yá *Kərisə lià tə, ba nə tɪga, wá dí yáá ba bwin ba nan tɪga wa. ¹⁷ Ku kwa nə, nə mù lià tə, nə nə wulə mu wa, nə dǎn wá zàn, nə twá ba nə. Nə wá dì bakwan tə wa, nə jəri Yuu-Tiu lanworu tə wa. Yá nə dǎn wá ya də Yuu-Tiu mǎŋá mama wuuu. ¹⁸ Á twá sùràn tə tə nə, á ma zùrì duən bicanɪ.

5

Ka kə sírí mǎŋá mama, ka dǎn Zwezi yoo

(Matia 24.36-51, Likə 12.35-40, 21.34-36, Romə tìán 13.11-14)

¹ Nə nubia-ba, ku kùb ba dèñ jə, sə ba púpúní ba pa aba, sə á lwarí mánjá tə də dun tə, nə *Yuu-Tiu nə wá pìí v bà. ² Á tətə yèé ku zəni də, Yuu-Tiu túrí dun tə wá ya, ndə ɲwìàn nə yàá ɲu, titun nə mánjá tə wa, ba nə ba v yoo buɲa. ³ Mánjá tə wa, ləzoni nə wá swìn, ba wú: «Luv zùrì! Yolwan kùb bá bà.» Mə ku mánjá tə wa, nə ba wá cùgù míámíán naa nədu. Ku wá dì ba yuu, ndə kan pùé nə yàá yí nətɔ, v liri mánjá wa. Yá ba liù mama bá jén. ⁴ Nə nubia-ba, á mù tà yikunu wa là, sə ku dun təntə ma twi ku dì á yuu ndə ɲwìàn nə. ⁵ Á mù mama yí poni là, á yí yícau là. Nə tà yikunu là, nə yí poni là. ⁶ Ku mù yiri nə, nə mù dànà ká dwè, ndə là duən nə. Nə mù kùb wà mɛ, sə nə dwè, sə nə ya là tə, nə nə buɲa zəni. ⁷ Mə titun nə nə, là yàá dwè. Mə titun nə nə, là yàá nyun swana ba sú. ⁸ Nə mù là tə, nə nə yí yícau là, nə mɛ, sə nə ya là tə, nə nə buɲa zəni. Nə mɛ, sə nə kəni nə waa Zwezi nə wuuu, nə ga sóní là tə, ku mù nə wá ya ndə pamana lugu gànù nə, nə nə zua. Nə ga jə yala də Yu wá jon nəba nə cuna tə wa. Nə tì yala təntə nə, ma fwa ndə pamana lugu yupuu nə. ⁹ Yu nə kúrí nəba, sə v twá də nə *Yuu-Tiu Zwezi-*Kərisə, v jon nəba. U wà nəba kúrí, sə v cùgù nəba də v lɔɲa tə, tə nə dáá zənzən. ¹⁰ Ku mù yiri nə, Zwezi-Kərisə tɔga nə yiri, sə nə vwə nə tiàn v nə ma ya mu wa, də nə nə tɔga, nə à yèé də nə mu nə wulə mánjá tə wa, v nə wá bà. ¹¹ Ku mù yiri nə, sə á dàn duən jìàn, sə á san duən nə, ndə nətɔ tə á nə dí yáá, á tɔɲa ku.

Sagi tə yígúré sùràn

(Ebərə-ba 13.7, 17, 20-21, Galasi tián 6.1-2, Romə tián 12.17-21, 1 Korentə tián 1.8-9)

¹² Nə nubia-ba, nə lòrì aba, sə á zìlò là tə, ba nə tɔɲa á pwéré wa. Ba mù là tə *Yuu-Tiu nə tún, sə ba ywàñ á yuu wa, sə ba kwè aba. ¹³ Á zìlò ba zənzən, sə á sóní ba ba tutuɲi tə yiri, ba nə tɔɲa. Á pian bican sié ya á pwéré wa.

¹⁴ Nə nubia-ba, nə kwè aba, sə á caga yayinyuna tə nii nə, sə á zùrì ba tə, fən nə jə ba jìàn. Á saŋa labwana tə nə, á jana pínú ba mama yoo wa. ¹⁵ Á cia á tìàn nə, sə liù mama dàn ká tun lwanı, ʋ ma ɲwín lwanı. Máná mama, sə á tun zəni duən yıra də ləzoni tə mama yıra.

¹⁶ Dün mama, sə á ya pupwən wa. ¹⁷ Á jùná Yu máná mama, á dànà ká yá. ¹⁸ Á kəni Yu lèè won mama wa. Yu nə swə ku nətu tə, á nə vwə *Kərisə yıra tə yırı.

¹⁹ Á dànà ká cì Yu-*Siŋu tə tutuŋı yáá nə. ²⁰ Yu yàá twá ʋ nii *sùsùnù nə, ʋ kàrì aba. Á dànà ká mun kàrà təntə. ²¹ Yoo mama wa, sə á dí yáá á ywàn ku wa, á kúrí ku tə, ku nə ziən, á lı á pa á tìàn nə. ²² Yoo mama wa, cia á tìàn nə də lwanı yiri mama.

²³ Yu tə, ʋ nə pın bican sié pa, sə á ya ʋ mù nyiən míámíán. ʋ mù nə wá cì, sə á tətə mama, də á pubuŋa tə, də á jèré tə, də á yıra tə dàn ká ja lwanı, ba nə wá swìn tə yoo, dün tə nə nə Yuu-Tiu Zwezi-Kərisə nə wá pìí ʋ bà. ²⁴ Yu kúrí aba. Yá ʋ mù ga nə yı pùé nədu. Yá ʋ mù nə wá tun ku yoo təntə.

²⁵ Nə nubia-ba, á jùná Yu də á pa nəba. ²⁶ Á jùná là tə duən tə mama, ba nə yı á nubia Kərisə yırı, də zìlú zənzən də sonu, ndə Kərisə là nə mɛ, sə ba fwa nətu. ²⁷ À lòrì aba pwəpwə də Yuu-Tiu yırı tə, sə á kàrì sagı ku tə là tə mama yáá con, ba nə yı nubia Kərisə yırı. ²⁸ Nə Yuu-Tiu Zwezi-Kərisə nə wá fwa pubwanu á yıra.